

Gure Jarrera' bigarren diskoarekin batera, Esan Ozenki Records aurkeztu dute. Independentziaren bideak eskatzen zuen hurrengo urratsa da. Hamazazpi kantu berri bildu



NEGU GORRIAK

Bere jarrera ozenki aldarrikatuz

dituzte lan honetan. Aurtengo udazkenean kantu horiek zuzenean entzuteko parada izango dugu, Baionan hasi, Europan jarraitu, Cubatik pasa eta Bilbon amaituko den 1991 Biraren barnean.

LOREA AGIRRE / DONOSTIA

Negu Gorriak taldeak kalean jarri berri du bigarren diskoa. 'Gure Jarrera' izena duena, edo 'Frankotiradorearen Jomuga' izena eraman zezakena. Fermin Muguruza 'frankotiradorearekin' elkartu ginen arratsalde, gauerdia pasata esan genion agur. Ezin esandako guztiak ekarri.

EGUNKARIA.— Zein da zuen jarrera?

F. MUGURUZA.— Independentzia, sozialismoa eta pirateria. Eta Esan Ozenki. Gure jarrera bereziki independentziaren kontutik dator. Gure jarrera: independentzia zentzu guztietan, horixe da gure borroka. Eta gainera disko honekin beste urrats bat eman dugu, geure zigu independentea sortuz.

Diskoaren azalean agertzen diren hiru banderak dira hain zuzen ere, Ferminen aipatzen dituenak: ikurriña, bandera gorria eta piraten bandera beltza. Independentzia pertsonala, nazionala, soziala, diskografikoa...

EGUNKARIA.— Nola hasten dira bigarren disko honen prestaketa urratsak?

FERMIN MUGURUZA.— Disko hau egiteko Xabier Montoia eta biok elkartu ginen. Eta Montoiak komentatu zidan, orain arte egin izan ditugun diskoak ipuin bildumak zirela, bai Negu Gorriak-enak, M-ak-enak eta baita Kortaturenak ere. Eta Egiako jaiak ziren egun haietan aipatu zidan, nobela bat egin behar genuela. Nahiz eta lotura zehatzik ez izan kantuek, osotasun bat lortuko lukeen disko bat egitea.

Euskal Herriaren radiografia gisako bat egitea proposatu zidan. Bera Estatu Batuetara joan zen eta ni hemen geratu nintzen benetan negu gorria izanda. Sei hilabeteko negu gorria. Kantak egiten hasi nintzen eta saiatu gara osotasun hori lortzen, egoera nola ikusten dugun isladatzen kantuz-kantu.

Diskoa 'Sarrerarekin' hasi eta 'Azkena' eta 'Epilogoarekin' amaitzen da. Hamazazpi kantu dira. Hauek azalean ez ditugu A eta B aldearen artean banatzen osotasuna duelako. Hasiera batean 'Frankotiradorearen jomuga' izena jar zezan pentsatu genuen. Baina azkenean 'Gure Jarrera' egokiago iruditu zitzaigun. Lehen kantuak ipuinak baziren, orain abesti bakoitza bala bat da. Kantu guztiak oso zorrotzak eta gordinak dira, hitzen zein musikaren aldetik. Azken

kantak du soilik halako 'patxanga' kutsua, noski zentzu onean.

«Hamazazpi bala» dira Ferminen esan bezala. 'Negu Gorriak', aurreko diskoa baino aratzagoa da bigarren hau, gitarra distorsionatu, erritmo desberdin, eta sampler ugarirekin (Mikel Laboa, Zarama, James Brown, Erik B and Rakim, Anton Reixa, Defunkt, Public Enemy, Living Colour...). Lehen diskoa baino koherenteago dela esango genuke, zehatzagoa, bidea topatu duena. Iñigo Muguruza eta Kaki Arkarazo gitarran direla, Anestesia taldeko Mikel baxuan jarri da eta Herrera de la Mancha emandako kontzertuaren ondoren, laugarren taldekide bihurtu da. Disko honetan BAP taldeko batera den Mikelek hartu du parte batera programatuarekin

batera akustikoa jotzen, eta baita ere talde bereko kantari den Enekok, koruak eginez. Lan berri honen aipamenean, aitatu beharrekoa Jon Maia bertsolaria da. 'Ez dezagun sal', 'Bisitari Iraultzailea', 'Zipaioen Matxinada', 'Buru Garbiketa', 'NG, Geurea Da Garaipena' eta 'Epilogo (Gora Herria)' kantuak hitzak egin ditu. Beste kantuen hitzak Ferminen osatu ditu. Aipatu Fugazi taldearen 'Song Number One' kantuaren bertsio bat dagoela eta baita Xabier Montoiaren poema bat oinarri duen kantua, 'Azkena'.

EGUNKARIA.— Definituko al zenuke disko berri honen estila?

FERMIN MUGURUZA.— Bigarren disko honetan jada Negu Gorriak gara eta Negu Gorriaren musika egiten dugu.

Erritmo asko nahasten ditugu, rap, hard-core, reggae, heavy, rock... Ez da erreza definitzen. Hala ere ez da porrusalda bat, Negu Gorriak da.

Iazko diskoarekin bideo-klipa kaleratu zuten. Oraingoan 1991 Bira izango dena irailean hasiko dute taldekideek. Beraz, M-ak, Delirium Tremends, BAP eta Anestesia taldeekin «tregua» sinatu dute irail eta urrirako. Baionan hasi eta Europatik bueltan, Cuba igaro eta Bilbon amaituko dute. «Dena erabat planifikatuta egin dugu. Asteaz hiru bat kontzertu izango ditugu, ez gehiagorik. Bestelakoan, nekagarria eta erretzeko modukoa da, kontzertuak jo eta jo ibiltzea».

EGUNKARIA.— Eta Esan Ozenki zigilua sortu duzue.

FERMIN MUGURUZA.— Bai, falta zitzaigun urratsa zen hori, gure zigilua sortzea. Kortaturen 'Kolpez Kolpe' diskotik aurrera egin ditugun lan guztiak autoprodukzioak izan dira. Grabazioa ordaindu, azala eta kontrazala egin, diskoaren barneko hitzak osatu... 'Azken guda dantza' eta 'Negu Gorriak' lanekin ere berdinean egin genuen. Diskoaren kontrol guztia gure gain hartu nahi izan dugu. Eta noski, honek eskatzen zuen hurrengo urratsa zigilua sortzea zen. Aurrerapausu hori egiteko gai garelako ikusi dugunean sortu dugu Esan Ozenki.

EGUNKARIA.— Zuen asmatan sartzen al da beste talde batzuen lanak kaleratzea?

FERMIN MUGURUZA.— Noski baietz. Behin azpiegitura hori muntatu eta gero gure inguruan dauden taldeek probetxatuko dute. Gurea, taldearen proiektu bat da eta aurrera ateratzen saiatuko gara. Disko hau

aurrekoa bezainbat zabalitzen bada, ondo badoa, beste lan batzuk egiteko aukera emango dugu.

EGUNKARIA.— Lehen diskoa, 'Negu Gorriak', Euskaditik kanpo nahiko ondo saldu da hala?

FERMIN MUGURUZA.— Orain arte hogeitabost mila ale inguru saldu ditugu eta hauek hamar mila Espainian. Beti esaten da euskaraz egindako gauzak, kanpoan ez dituztela nahi, baina kontuz horrekin! Askotan ez da inongo lanik egiten muga hori hautsi eta konformatu egiten gara hemen saltzen dugunarekin, ez gara saiatzen beste modu batean bideratzen. Egia da, euskararen muga psikologikoa esistitzen dela, baina baita gaztelaraz kantatuz ere. Zailago dela euskaraz? Ados. Baina horretarako gaudugu hain temati.



Negu Gorria taldeak irailean eta urrian bira egingo du.

AITOR BAYO

Musika

KOORDINATZAILEA

Gorka Jimenez

ERREDAKZIOA

Lorea Agirre

LAGUNTZAILEAK

Xabier Arzak

Asier Bergaretxe

Haritz Monreal

Asier Balberde